

Канон святой праведной Анне, матери Пресвятой Богородицы

Тропарь, глас 4

Жизнь рождшую во чреве носила еси, чистую Богоматерь, богомудрая Анно. Темже к приятию небесному, идеже веселящихся жилище, в славе радуешься ныне преставилася еси, чтущим тя любовью прегрешений просящи очищение, присноблаженная. (*Дважды.*)

Слава, и ныне. Богородичен: Еже от века утаенное и Ангелом несведомое таинство, Тобою, Богородице, сущим на земли явился Бог, в неслитном соединении воплощаемь, и Крест волею нас ради восприим, имже воскресив первозданного, спасе от смерти души наша.

Канон

Глас 4

Песнь 1

Ирмос: Отверзу уста моя, и наполнятся Духа, и слово отрыгну Царице Матери, и явлюся светло торжествуя, и воспою, радуясь, Тоя чудеса.

Припев: Святая праведная Анно, моли Бога о нас .

Согрешений прощение, и злых избавление, и жития исправление ныне ми испроси, твою светносную память почитающему днесь, Анно всехвальная.

Святая праведная Анно, моли Бога о нас .

Живот Рождшую боголепно родила еси, темже к присножизненной жизни преставилася еси, наслаждающихся радости неизглаголанная, и света невечерняго, Анно богозванная.

Благодать Божественная к радости престаив, без семени Юже роди Дщи сея, Чистая, и предстоит со многим дерзновением, Господеви молящися, спастися всем.

Слава: Праведно и преподобно поживши, всехвальная, к праведному Господу ныне преставилася еси, радоватися с праведными иже от века: темже сошедшеся ты верою почитаем.

И ныне: Из Тебе нам возсия Солнце праведное, и всю озари богоразумием землю, и разори мглу неразумия, Чистая, и Всенепорочная и Всеблаженная.

Моли Бога о нас, святая праведная Анно, яко мы усердно к тебе прибегаем, скорой помощнице и молитвеннице о душах наших. (Поклон.)

Песнь 3

Ирмос: Не мудростию, и силою, и богатством хвалимся, но Тобою Отчею Ипостасною мудростию, Христе: несть бо свят, паче Тебе, Человеколюбче.

Святая праведная Анно, моли Бога о нас .

Заченшую Содержащаго вся зачала еси, и родила еси паче слова Христа рождшую: темже твое успение, Анно, почитаем.

Святая праведная Анно, моли Бога о нас .

С похвалами совершается славная память твоя, яко родила еси нам хвалений превышшую, чистую Богоматерь, Анно богоприятная.

Святая праведная Анно, моли Бога о нас .

Якоже солнце с луною Анне совокупляся славный Иоаким, девства зарю раждает, еяже ради Божества луча просия.

Слава: Гору Божественную из чресл твоих родила еси, и к горам мысленным, и рая селением, Анно, преминула еси, богоблаженная.

И ныне: Тя предстательницу твердую, Богородительнице, стяжахом, упование на Тя возложивше спасаемся, и к Тебе бо прибегающе ограждаемся.

Моли Бога о нас, святая праведная Анно, яко мы усердно к тебе прибегаем, скорой помощнице и молитвеннице о душах наших. (Поклон.)

Господи помилуй. (Трижды.)

Седален, глас 8

Матере Владыки и Творца мати была еси, Анно всехвальная, Того повеления присно хранящи; сего ради умерши, к жизни безсмертней преставилася еси воистинну, и к свету невечернему. Темже светоносную и святую твою память совершаем, духом просвещаеми всегда, и согласно вопием ти: моли Христа Бога, грехов оставление даровати чтущим любовь святую память твою.

Слава, и ныне. Богородичен: Премудрость и Слово в Твоем чреве зачещи неопально, Мати Божия, миру родила еси мир Содержащаго и в объятиях понесла еси вся Носящаго, Питателя всех и Творца твари. Темже молю Тя, всевятая Дево, и верно славлю Тя, избавитися ми от прегрешений, и в день суда, егда предстати имам пред лицом Создателя моего, Владычице Дево чистая, твою помощь тогда подаждь ми: вся бо можещи, елика хощещи, Всепетая.

Песнь 4

Ирмос: Седяй в славе на Престоле Божества во облаце легце, прииде Иисус Пребожественный, нетленною Дланию, и спасе зовущия: слава, Христе, силе Твоей.

Святая праведная Анно, моли Бога о нас .

Иже в законе писаная поучающися совершила еси, и Законодавца Матере мати была еси, темже тебе вся тварь по долгу ныне сотворяет твою радостно память.

Святая праведная Анно, моли Бога о нас .

Блаженное чрево твое воистинну, носившее Свет мира внутрь во чреве носившую, и сосца твоя красная, яко доившая доившую, Анно, Христа, Питателя нашего.

Слава: Яко поживши непорочно, Юже непорочно родила еси Богородицу Отроковицу, Слово Отчее породившую, и к Нему со славою вселилася еси, обожена честными воистинну причастии.

И ныне: Девы чрево стог, якоже на гумне воистинну явися, клас неделанен имущи, Имже питается всякое естество, зовущее: Всесильне, слава, Христе, силе Твоей.

Моли Бога о нас, святая праведная Анно, яко мы усердно к тебе прибегаем, скорой помощнице и молитвеннице о душах наших. (*Поклон.*)

Песнь 5

Ирмос: Нечестивии не узрят славы Твоей, Христе, но мы Тя, Единородне, Отеческия славы сияние Божества, от нощи утренююще, воспеваем Тя, Человеколюбче.

Святая праведная Анно, моли Бога о нас .

Небо родила еси на земли воистинну, рождшую небесе Творца, днесь ты представляюща к небесным со славою, Анно преславная.

Святая праведная Анно, моли Бога о нас .

С невещественными чинми, невещественным умом, ликуеши радостно, исполняема сияния Богатодавца: но нас поминай, верою хвалящих тя.

Слава: От корене Иесеева прозябшая яве, благоцветущий жезл Чистую израстила еси, славная, израстившую Цвет неувядающий, Иисуса, Избавителя нашего.

И ныне: К Тебе прибегаю единой Державней, верных покрову, на Тя надежду возлагаю спасения моего, Пресвятая Владычице Богородице, не презри мене.

Моли Бога о нас, святая праведная Анно, яко мы усердно к тебе прибегаем, скорой помощнице и молитвеннице о душах наших. (*Поклон.*)

Песнь в

Ирмос: Пожру Ти со гласом хваления, Господи, Церковь вопиет Ти, от бесовския крове очищися, ради милости от ребр Твоих истекшею кровию.

Святая праведная Анно, моли Бога о нас .

Господа Иисуса Бога праотцы, Иоаким же и Анна, правдою украшени, по достоянию в песнех да восхваляются днесь.

Святая праведная Анно, моли Бога о нас .

Всяческих похвал Анна превзыде, яко всякия похвалы превозшедшую родила есть. Сего ради в лице праведных водворяется.

Святая праведная Анно, моли Бога о нас .

Светоносия и светлости исполнена память твоя. Сияния же в мире спасительная испущающи, целомудренная Анно, дарований всяческих исполни.

Слава: Ручку, манну божественную вместившую, во чреве носила еси, Анно, и с Нею ныне на небесех живущи, о всех молишися, прехвальная.

И ныне: От Анны мирови родилася еси, Царице, всех Царя рождшая, и девствующи по рождестве, Херувим превышши, Пренепорочная.

Моли Бога о нас, святая праведная Анно, яко мы усердно к тебе прибегаем, скорой помощнице и молитвеннице о душах наших. (*Поклон.*)

Господи помилуй. (*Трижды.*) Слава, и ныне.

Кондак, глас 2

Прародителей Христовых память празднуем, тех верно просяще помощи, избавитися всем от всякия скорби, зовущим: Бог наш с нами, сих прославлей, якоже благоволи.

Икос

Пророчески снидемся вси, достойно пети праматере Христовы блаженное преставление: днесь бо от временныя преставися жизни, на небесех с радостию шествие творящи радуется, яко сущи мати истинная сущия Богородицы, и взывает верно: величит душа моя Господа, яко родих Сего Матерь на земли, Иже Сию прославлей, якоже благоволи.

Песнь 7

Ирмос: Спасый во огни авраамския Твоя отроки, и халдеи убив, яже правда праведно уловляше, препетый Господи, Боже отец наших, благословен еси.

Святая праведная Анно, моли Бога о нас .

Яко жизни истинныя, Анно, Матерь рождши, к жизни истинней преставилася еси ко свету, взывающи: препетый Господи, Боже отец

наших, благословен еси.

Святая праведная Анно, моли Бога о нас .

Яже Матери Избавителя мати сущи, Анно, от земли к небеси добродетельми украшена востече, во хвалении зовущи: Боже отец наших, благословен еси.

Святая праведная Анно, моли Бога о нас .

К нескончаемей жизни, к пространней широте райския пищи, к невечернему свету отошла еси, богоносице, зовущи: Боже отец наших, благословен еси.

Слава: Испещрена добродетельми, добротою божественных дарований украшена, к Богу приложися, непрестанно зовущи: препетый Господи, Боже отец наших, благословен еси.

И ныне: Украшена добротами добродетелей, красного паче сынов человеческих родила еси, Слово, Пренепорочная, красными лепотами украшающаго Тебе песнословящих.

Моли Бога о нас, святая праведная Анно, яко мы усердно к тебе прибегаем, скорой помощнице и молитвеннице о душах наших. (*Поклон.*)

Песнь 8

Ирмос: Отроки благочестивыя в печи, рождество Богородичо спасло есть, тогда убо образуемое, ныне же действующее, вселенную всю воздвизает пети Тебе: Господа пойте, дела, и превозносите Его во вся веки.

Святая праведная Анно, моли Бога о нас .

Мати единыя Богородицы, яже неплоды прежде, ныне же прамати Христова, якоже неплодства, сице и мертвости совлекши одежду, во стране живущих вопиет: Господа пойте, дела, и превозносите Его во вся веки.

Святая праведная Анно, моли Бога о нас .

Христос тебе двери вышшия отверзе, радостно тя прият: яко дверь родила еси, еуже Сам пройде, и затворену яви по исхождении, богомудрая, достойнопетая Анно; темже ты почитаем вернии во веки.

Слава: Свято житие скончавши, святыя Приснодевы мати была еси, Яже Пресвятое Слово породи, освящение и избавление нам подающа, богомудрая и досточудная Анно: темже ты поем присно вернии во веки.

И ныне: Многими мя содержима бедами, и бурю греховною бедствующаго, ко пристанищу невлаемому дыханию Духа, Богородительнице Владычице, ныне настави: пристанище бо еси христиан. Темже Ты поем во вся веки.

Моли Бога о нас, святая праведная Анно, яко мы усердно к тебе прибегаем, скорой помощнице и молитвеннице о душах наших. (*Поклон.*)

Песнь 9

Ирмос: Ева убо недугом преслушания клятву вселила есть; Ты же, Дево, Богородице, прозябением чревоношения, мирови благословение процвела еси: тем Тя вси величаем.

Святая праведная Анно, моли Бога о нас .

От земли чрева твоего воистинну родися земля святая, неделанен клас прозябши безсеменно, мирови Питателя и Господа, тебе к пищи неизживаемой, Анно, премудро преставльшаго.

Святая праведная Анно, моли Бога о нас .

Память твоя днесь нам возсия, солнца светлейши, сиянием богатых даров нас просвещающи, всечестная, и мрак страстей изымающи; юже совершающих сохрани.

Слава: Божественный нас Иоаким и Анна богомудрая и всеславная, супруг честный и светоносный, созывают божественне веселитися сих праздником: егоже уясни Светодавец всех Господь.

И ныне: Марие, Госпоже всех, всякими мя порабощена согрешении, ныне свободи: Сама бо Свободителя родила еси всех, работы нас избавльшаго греховныя, божественным мановением.

Моли Бога о нас, святая праведная Анно, яко мы усердно к тебе прибегаем, скорой помощнице и молитвеннице о душах наших. (*Поклон.*)

Тропарь, глас 4

Жизнь рождшую во чреве носила еси, чистую Богоматерь, богомудрая Анно. Темже к приятию небесному, идеже веселящихся жилище, в славе радующися ныне преставилася еси, чтущим тя любовью прегрешений просящи очищение, присноблаженная.

Кондак, глас 2

Слава: Прародителей Христовых память празднуем, тех верно просяще помощи, избавитися всем от всякия скорби, зовущим: Бог наш с нами, сих прославлен, якоже благоволи.

И ныне, Богородичен: Вся паче смысла, вся преславная Твоя, Богородице, таинства, чистоте запечатанной, и девству храниму, Мати позналася еси неложна, Бога рождши истиннаго, Того моли спастися душам нашим.